



TEKS UCAPAN

**YB DATUK SERI DR. NORAINI AHMAD MENTERI
PENGAJIAN TINGGI**

SEMPENA

**MAJLIS SAMBUTAN
DEKAD BAHASA KEBANGSAAN PERINGKAT
KEMENTERIAN PENGAJIAN TINGGI
DAN PENGANUGERAHAN
TOKOH AKADEMIK BAHASA MELAYU TAHUN
2021**

**3 DISEMBER 2021 (JUMAAT)
3.00 PETANG**

Bismillahirrahmannirrahim.

Assalamualaikum Warahmatullahi Wabarakatuh dan Salam Sejahtera.

(SALUTASI)

(Urus setia akan sediakan senarai saluti secara berasingan)

MUKADIMAH

1. Alhamdulillah segala puji dan syukur dipanjatkan ke hadrat Allah S.W.T kerana dengan limpah kurnia dan inayah-Nya jua, maka dapat kita bersama-sama dalam Majlis Sambutan Dekad Bahasa Kebangsaan Peringkat Kementerian Pengajian Tinggi dan Penganugerahan Tokoh Akademik Bahasa Melayu Tahun 2021 pada hari ini.

2. Sesungguhnya, sesi ini memberikan makna yang cukup besar kepada usaha Kementerian Pengajian Tinggi dalam memartabatkan bahasa Melayu di arena pendidikan tinggi negara.

USAHA PENGUKUHAN BAHASA MELAYU DI INSTITUSI PENGAJIAN TINGGI (IPT)

Hadirin sekalian,

3. Umum mengetahui, kedudukan bahasa Melayu sebagai bahasa kebangsaan telah termaktub dalam Perkara 152 Perlembagaan Persekutuan. Malah, Akta Bahasa Kebangsaan turut menyatakan bahawa bahasa kebangsaan hendaklah digunakan bagi maksud urusan rasmi.

Dalam konteks Sektor Awam secara keseluruhannya pula, pemerkasaan penggunaan bahasa kebangsaan dalam perkhidmatan awam digariskan melalui Pekeliling Perkhidmatan Bilangan 1 Tahun 2020 yang dikeluarkan oleh Jabatan Perkhidmatan Awam. Walaupun dalam pekeliling ini tidak disebut secara spesifik dari sudut penggunaan bahasa Melayu di Sektor Pengajian Tinggi, namun secara dasarnya, bahasa Melayu ialah bahasa pengantar utama di peringkat universiti dan ini adalah selaras dengan Dasar Pendidikan Kebangsaan.

4. Bahasa Melayu juga merupakan lambang kedaulatan negara dan jati diri bangsa. Oleh itu, kecintaan kepada bahasa perlu diperkasakan dalam kalangan warga KPT khususnya pelajarpelajar IPT agar obor bangga dan cinta kepada bahasa kebangsaan kita terus menyala.

5. Jadinya, upaya untuk memartabatkan bahasa Melayu sebagai 'Bahasa Ilmu' di IPT harus kita santuni sebaik mungkin. Dalam hubungan ini, KPT sentiasa komited mendokong aspirasi mengukuhkan kedudukan bahasa Melayu khususnya di IPT. Pelbagai usaha dilaksanakan termasuklah mewujudkan Pelan Tindakan Memartabatkan Bahasa Melayu Sebagai Bahasa Ilmu di Universiti Awam. Pada awalnya, pelaksanaan pelan ini adalah untuk tempoh selama lima tahun bermula pada tahun 2011 hingga 2015. Kesyinambungannya diteruskan dengan pelan yang telah ditambah baik untuk tempoh 2016 – 2020.

6. Inisiatif ini dilihat sebagai langkah yang holistik dalam mengangkat darjat bahasa Melayu sebagai bahasa pengantar di IPT. Malah, penggunaan bahasa Melayu dalam aktiviti akademik, penghasilan graduan, pembangunan, pembudayaan serta pengantarabangsaan akan dapat mengukuhkan lagi bahasa yang pernah diiktiraf dalam sejarah dunia sebagai 'lingua franca' ini.

7. Justeru, saya berharap agar Pelan Memartabatkan Bahasa Melayu di IPT akan diteruskan pelaksanaannya dengan beberapa penambahbaikan sejajar dengan perkembangan semasa. Saya percaya pelan yang akan dibangunkan kelak boleh dijadikan sebagai satu garis panduan kepada semua IPT di Malaysia dalam memastikan bahasa Melayu terus gah dan relevan dalam dunia pendidikan tinggi.

SAMBUTAN DEKAD BAHASA KEBANGSAAN
PERINGKAT KEMENTERIAN PENGAJIAN
TINGGI

Sidang hadirin yang saya hormati sekalian,

8. Sambutan Dekad Bahasa Kebangsaan merupakan antara program tahunan kerajaan yang bertujuan untuk meningkatkan kesedaran dan kecintaan terhadap bahasa kebangsaan. Pelaksanaan program ini mengambil pendekatan merakyatkan bahasa kebangsaan dan sastera Melayu dengan penglibatan masyarakat pelbagai kaum.
9. Setinggi-tinggi ucapan tahniah saya zahirkan kepada semua warga Kementerian yang mengambil bahagian dalam program-program yang dianjurkan sempena dengan Sambutan Dekad Bahasa Kebangsaan pada tahun ini.

Saya melihat banyak bakat telah dicungkil melalui acara-acara yang dianjurkan seperti pertandingan deklamasi sajak, penciptaan pantun serta sayembara kuiz, cakna bahasa dan sastera.

10. Tidak lupa juga penyertaan IPT dalam pertandingan poster kajian dalam bahasa Melayu. Ini menunjukkan bahawa bahasa Melayu berupaya menjadi wadah dalam arena penyelidikan. Harapan saya agar program seumpama ini akan dijalankan secara berterusan bagi menyubur rasa cinta kepada bahasa kebangsaan kita.

ANUGERAH TOKOH AKADEMIK **BAHASA MELAYU**

Tuan-tuan dan puan-puan sekalian,

11. Untuk makluman, pada hari ini juga kita akan bersama-sama meraikan penerima Anugerah Tokoh Akademik Bahasa Melayu atau ATABM 2021. Penganugerahan yang dianjurkan oleh Kementerian sejak tahun 2012 ini merupakan satu daripada inisiatif strategik yang terkandung dalam Pelan Tindakan Memartabatkan Bahasa Melayu sebagai Bahasa Ilmu di IPT. Matlamatnya adalah untuk mengiktiraf ahli akademik di IPT yang telah memperlihatkan dampak penggunaan bahasa Melayu sebagai bahasa ilmu di samping menjadi daya tarikan kepada ahli akademik untuk menghasilkan lebih banyak penulisan dan penerbitan dalam bahasa Melayu.

12. Sehingga tahun 2020, seramai tujuh ahli akademik telah dinobatkan sebagai Tokoh Akademik Bahasa Melayu. Tokoh-tokoh ini terdiri daripada pelbagai latar belakang bidang kepakaran. Antaranya termasuklah bidang Linguistik, Kejuruteraan, Perubatan, Pendidikan Awal Kanak-kanak dan Kesusasteraan.

13. Pada tahun 2020 juga, KPT melangkah setapak lagi dengan memperkenalkan dua anugerah baharu, iaitu Anugerah Tokoh Harapan Akademik Bahasa Melayu; dan Anugerah Tokoh Bahasa Melayu Sektor Teknikal. Inisiatif ini bertujuan untuk memperluas usaha memartabatkan bahasa Melayu ke sektor teknikal dan juga dalam kalangan ahli akademik muda di bawah usia 40 tahun.

14. Difahami, bagi tahun ini, terdapat persaingan yang sengit apabila lebih dua puluh permohonan telah diterima bagi ketiga-tiga anugerah yang dipertandingkan. Jadinya, pada 17 dan 24 September 2021 yang lalu, Jawatankuasa Teknikal Anugerah Tokoh Akademik Bahasa Melayu, yang terdiri daripada pakar-pakar bahasa Melayu telah mengadakan bengkel khas bagi menyemak, menyaring dan menilai kesemua permohonan tersebut. Ini penting agar tokoh yang terbaik dipilih bagi menerima anugerah pada tahun ini.

15. Justeru, sekalung penghargaan saya rakamkan kepada semua yang terlibat atas segala kerjasama dan komitmen yang telah diberikan. Bukan senang hendak membuat penilaian dan pemilihan. Ibarat menarik rambut dalam tepung, penilaian perlu dibuat dengan sangat teliti. Alhamdulillah, prosesnya berjalan dengan lancar dan perima anugerah yang telah dikenal pasti akan bakal kita ketahui hari ini.

PENUTUP

Para hadirin yang saya hormati,

16. Bahasa Melayu harus terus dijulung sebagai bahasa ilmu walaupun kita berada di arena revolusi industri 4.0 yang banyak menggunakan bahasa Inggeris.

Jika kena caranya, tidak mustahil andai dalam era ini kita dapat melihat kelahiran pelapis-pelapis harapan yang mempunyai iltizam seumpama Abdullah Munsyi – tokoh bahasa yang begitu gigih memperjuangkan tentang nahu bahasa Melayu dan telah pun menghasilkan karya sulung beliau ketika berumur 34 tahun.

17. Menjadi harapan saya agar semua pihak yang berada di institusi pendidikan tinggi melestarikan usaha pengukuhan bahasa Melayu. Kepada semua penerima Anugerah Tokoh Akademik Bahasa Melayu dan pemenang Sayembara Dekad Bahasa Kebangsaan peringkat Kementerian, tahniah dan sekalung syabas saya zahirkan.

18. Terima kasih juga saya ucapkan kepada semua pihak yang terlibat dalam menjayakan sambutan Dekad Bahasa Kebangsaan KPT pada tahun ini, terutamanya kepada rakan strategik, Dewan Bahasa dan Pustaka atas segala sokongan yang diberikan. Terima kasih saya ucapkan.

Sekian.

Wabilahi taufik walhidayah wassalamualaikum warahmatullahi wabarakatuh.